

摘藻堂四庫全書薈要

集部

欽定四庫全書薈要

集部

端明集卷三十八至
四十

詳校官助教臣常循



欽定四庫全書薈要卷一萬四千五百三十八

集部

端明集卷三十八

宋 蔡襄 撰

墓誌銘

尚書屯田員外郎林君墓誌銘

君諱冀字希聖潮州海陽人也曾祖珍祖知藝皆以

厚行為鄉人所慕父洪裔贈殿中丞少喜學問手鈔
經史傳記數千萬言日講諷自休以是終其身母夫
人許氏封潁川縣太君君既勝冠得所藏舊書益刻

厲考治以為詞大中祥符八年一舉中進士第歷辰
惠二州從事以判入高等廼授大理丞又遷殿中丞
太常博士入尚書省為屯田員外郎歷知歙州績溪
及歙二縣治有善迹移同判桂州以母老還官事歸
養不得請改知梅州被喪去職及還朝復官通判杭
州寶元元年三司度支副使段公少連薦君監京師
征算二年十一月戊子疾發且殆其子從先取股肉
雜糜殮以進祈疾少瘳卒以其月庚子終于官所年

五十四康定二年十一月初八日即葬于大墓之域
夫人黃氏封萬年縣君持躬有法式處大族上下無
異言子男從先從思從可皆孝謹力學女三人長適
進士盧幾次適邵武縣尉阮邈其季始筭孫六人皆
幼君讀書不以博記廣聞為志務躬行其所知者平
居與衆言開陳理要或持異論亦未嘗力辨以屈之
及莅官當事前有事勢可壓以奪人者君自守益固
其直而後已在辰州時五溪夷獠嘯聚攻剽城中益

兵以守君從所分卒往來督運糧餉每先期至事平
詔褒之歙州舊常第民資產歲歛錢三十萬傭僦舟人
挽浙江鹽鬻以牟利久之民愈病或冗散旁郡轉運使
以利病聞仍表君為歙縣兼總運鹽事君至更請募人
為卒度材為舟歲漕益多而歛不逮下流者還集其服
勞革弊舉是餘可知也初君卒將作監丞黃君城以書
至洛謂某曰林氏諸孤哀不能言將扶持其柩背淮絕
江山出吳閩數千里還故鄉以葬幸而得子之文以銘

其先烈不亦慰諸幽乎某明道中從官漳州始遇君郡
下君以某爲志於古者作詩稱譽嗚呼今以是銘君墓
辭曰

求而勿懈者享則既豐委而不與者畀廼弗克覃延厥
後兮紹德收攻列文幽堂兮以訊無窮

葛君墓誌銘

君諱宏字文淵先世居廣陵唐末廣陵兵起舉族渡江
而南至江陰遂留家焉曾大父諱廓以耆德聞于鄉邦

大父諱詳少嘗負知能謂於時無所用不若施于吾家以自効乃力于田數十年累致巨資益散施以廣名稱父惟明一舉進士不中退而積書數百千卷戒子孫業之君始稚已能去紛侈從鄉黨之學既長記誦通博由鄉舉至京師視等輩之賢已者輸盡誠禮屏所挾焉而下之故與游多聞世之士意氣豪舉文章亦甚壯健不能工偶配阜白翦磨細碎以是五試春官輒觸罷晚乃寄隱於酒觀少年新學躡其後跳取貴盛一以命決不

挂于中然以已之所學稽本於古人揣稱當世之務甚
悉苟汨焉無聞孰與發而在人慶厯元年秋詔選進士
君時以霑疾猶強力持筆研屬文辭以求貢比歸益疾
殆九月四日終于家享年五十有二以某日葬于青陽
鄉母夫人承氏與君之父皆年七十餘而哭其冢子哀
甚夫人耿氏躬率禮德以宜其家子男鈞鑄鏜皆嚮學
敦謹將大其世二女長適進士陳賢又其季尚幼君於
某爲婚兄弟求知君之深而宜銘其壙者某不得辭銘

曰

悲乎文淵學足以辨興亡之端而文足以通義理之要
卒不克施其命矣夫

葛處士夫人墓誌銘

夫人姓承氏世爲江陰人居其家以孝謹稱父諱懷與
擇其里中人以行聞者而歸之遂嫁爲處士葛君惟明
之妻當夫人之歸葛氏方爲大姓族屬親疎姑姊娣姒
節時往來佩簪纓珥序列慶賀者甚衆夫人處其間自

少至壯且老卒無與忤孝婦於尊章恭畏自力姑於其婦益慰愛之故其生雖親者不敢少慢而死也雖疎者哭之亦盡其哀享年七十有六其終于慶曆二年八月五日以十月二十日葬于青陽鄉脩德里之原下生子八人男五人宏求皆舉進士不中第卒定向勤養不懈宜上書論邊兵利害得本軍司仕參軍孫六人鈞最爲長既有子矣女三人長適屯田員外郎凌景陽封丹陽縣君次適進士陳玉皆先夫人而亡季女之壻著作佐

郎館閣校勘蔡某爲誌其所葬而又銘之曰

夫人於家淑孝則聞既歸而宜法度是勤有子入官女
爲士妻家婦持孫福祉實多三月而葬中禮之常考卜
既吉寘文以藏

贈殿中丞陳府君墓誌銘

府君之先曾祖諱沆本魏人仕後唐因官江東爲錢吳
越王僞署朝散郎知明州鄞縣卒葬四明山下子孫始
爲吳人王父諱鏜聲名出吳中錢氏欲以補闕官起之

不可皇考諱處瑩博學於周易楊雄太玄尤推悉其要
錢氏數以禮屈致冀得爲用亦避不顧及錢氏以地歸
本朝遂徙居京師府君既長矣傳解經術尤工楷法得
善書多手鈔之嘗夢人有授其著者因專意治易其得
要妙皆誠心潛通不拔舊書師說貴游大人或即其居
而訊禍福府君曰吾老於易於是求聖人心焉又以其
數度天地萬物消長及天下之所以興廢人之窮通不
足引吾術以証愈閉距不言日與諸子考經傳疑說雍

然自娛垂四十年以大中祥符四年八月十四日終年六十四男三人長曰見素終尚書屯田員外郎曰大素字仲華祕書丞審刑詳議官曰元素舉進士女二人長適進士盧冲次適殿中丞潘軫府君諱光現字晦之以子登朝累贈殿中丞娶吳興范氏追封本縣太君以慶厯二年十一月二十七日葬河南緱氏縣唐興鄉蔣里以吳興太君祔焉仲華於某同年中進士第先葬以其世家求諸銘判銘之言名也列其先德以及自名府君

之德著而嗣子繼以仕進仲華泣官廉平以材能稱於時將大其後銘曰

世以善脩而賤貧者或驗於天若府君究易之本行潔而堅其享之厚孰與夫空富而且貴者耶

尚書主客郎中王君墓誌銘

君諱惟正字晦蒙太原人曾祖王父諱襲王父諱劇贈大理評事皇考諱恩累贈尚書工部侍郎皇妣范氏追封昌樂縣太君胡氏封永安縣太君王氏之居太原者

爲大姓自君之先數世無顯者君始舉明經咸平元年
中第選注瀛州司戶叅軍會契丹鈔邊河北用兵擇能
吏督畱糧君兼魏鎮定三州皆以期辦轉運司以狀聞
於朝授光化軍判官兼通判用保薦者改光祿寺丞東
封西祀恩再遷大理寺丞贊善大夫又遷殿中丞國子
博士賜緋衣銀魚入尚書省爲虞部金部司勲三員外
主客郎中初知懷安之金水通判耀州事州將尤濤與
君論事不相能條君十八事不如法者以聞詔辦之逮

獄具而濤悉以誣服人益稱君廉能移知絳州歲饑民
流輒發常平倉粟賑之時權臣有不喜更在州下風君
去之且得善官不肯應其後當丞殿中抑久不報君力
辨乃遷被工部喪罷歸服除厯知遼雅衛德四州雅州
之俗右鬼神而巫覡憑依禍福勤民財以自利君按祠
廟之不在祀典者投其像於江徹屋材以補官舍巫覡
爲之易業龍圖閣直學士劉公煜表君廉平可監刺列
郡授荆湖南路提點刑獄升廣南西路轉運使時安南

西道節度使南平王李蘊薨二子與其叔爭立叛掠宜
欽邕三州敗戍兵殺寨主勢以益振朝廷委君與曹克
明圖之君訓兵走粟爲守禦策作木龍斷欽廉海路賊
不得進君度其內爭必一而止勒兵待之踰年一子果
殺其弟叔自立遣使稱藩交趾平君應例遷回讓贈王
父一官即評事君也居嶺外聞祖母病請解使職幸得
便郡以就養遂知解州道京師圖上交趾事宜賜三品
服至郡十餘日徙晉州未幾爲江東路轉運使丁永安

太君憂還充三司戶部判官言錢穀利病多所施行潞
州於河東號爲繁會君得之勵精爲治屢辨冤獄入判
三司憑由司出領亳州密州最後再爲絳州慶厯二年
七月二十日終于解壽年七十一以四年九月二十日
葬于某所夫人韓氏封萬年縣君嬪配之宜治家教子
悉有法度子五人長曰敏中試大理評事監楚州鹽倉
曰執中未仕而亡曰柔中遼州遼山尉皆以蔭補官謹
而好學爲吏得其家法女適殿中丞長路開次適潁州

陳晟次適右侍禁陳宗望孫三人君喜書史老益不懈
尤通緯象卜筮之說持已以儉奉官以法仕五十年而
無吏過將葬諸孤謀曰古人之傳於如今者託於文也
況郎官於令應刻石以載功德不刻不傳其惟孝思乎
建中裒叙其世系官次治迹走求文于余爲之銘曰
吏治之興功利脩科條奮奇斷而不顧者斯可謂之材
矣然不移勢要根人以資已唯是令善必昌厥後

右千牛衛大將軍致仕陳公墓誌銘

公諱顥文字輔臣其先世臨淮人曰珂者因官入閩居
泉州仙遊兵阻道絕乃留不還公之曾王父曰太子太
傅諱某王父曰太子太師諱隲皇考曰贈中書令謚曰
忠順累封南康郡王諱洪進皇妣曰鄧國太夫人林氏
曰河南縣太君林氏者以公追封公之配曰太原縣君
故永清軍節度使贈中書令王公守斌之女公之男八
人長曰西頭供奉官宗顏次曰三班奉職宗晦宗魯其
幼而夭者曰宗回宗旦皆奉職曰宗周借職曰宗可宗

傑皆未仕女十人長適皇屬右屯衛大將軍宗鼎三人
尚幼六人蚤世一爲內殿崇班閣門祇候馬宗懿之妻
公之歷官自南康王上漳泉土地之圖除武寧軍節度
使授公徐州衙內都指揮使王薨補西頭供奉官七遷
至供備庫使真宗皇帝祀汾陰恩恤勲德之後以公爲
閣門祇候公之歷任監筦之局六秦州長道鹽酒稅護
民渠文思院致遠務芻桔之司酒齊之職兵都監之命
四興元府舒廣二州許州之長葛一爲泗洲巡檢再爲

明越及虔吉郡都巡檢使慶厯二年以右千牛衛大將軍致仕明年二月癸卯終于建初坊之第春秋六十九以其年十二月丙辰葬于開封府祥符縣魏陵鄉吳子原從先王之域公之世家功業列于太史氏銘于大墓宜不復紀然某少時居鄉里聞長老爲某言王本末自王氏世有全閩其後部將黃紹頗据泉州以守王與留從効誅紹頗有功及從効爲帥王爲之副從効死張漢思繼之漢思昏不治王自代之太祖皇帝御天下間道

請命於朝即授平海軍節度使太平興國三年以其族
歸京師獻所有地朝廷不加一鏹而籍二州之人二州
之人耕於山漁於澤不罹禍患涵濡太平之澤者王之
庇祐我莫知深矣及其游官知公之爲人處豐貴顯榮
之間而能脫奢豪之習清約恬默以自娛適招延士人
講論書史仕宦四十年率以次遷未嘗吐一語以干勢
要人臨官處事一以法令不能輒爲輕重將老即引去
截然有自止不屈之意終始善良公之沒嗣子宗顏復

以孝聞本朝之制隸武職者不爲居父母喪去官宗顏
力求解罷服喪以盡子道朝廷從而獎之以率勵天下
又能教其弟宗晦宗魯從學謹飭信乎能蹈孝友之節
者也供奉君謂予曰嗟吾母氏一禮法持守門戶鞠養
諸子慈孝均一自先君子棄世時發篋視諸生平告勅
撫而泣且戒曰已矣乎不復見也孰能永乃翁之傳者
耶孤敢以哀請幸次先君子之行誌於墓某於陳氏所
聞所見通知其三世遂銘之曰

推公之父舉二州之地歸命於朝世名以忠推公之子
善天下之善服喪于家人謂之孝公乎上承乎忠而下
遺其孝公之令德於是而顯十世之宥或以無有云誰
必之視公之後

尚書司封員外郎曹公墓誌銘

公諱脩睦字某建安郡人爲學通博性介廉喜自脩立
大中祥符五年登進士第調撫州軍事推官南雄州判
官改大理寺丞知邵武軍之邵武縣遷殿中丞知鬱林

州聞母夫人疾委州印於其佐北走歸道未至被喪
哀瘠過禮服除以大常博士通判越州再遷尚書屯田
都官二員外通判泉州知邵武軍民有兄弟訟田者公
爲陳兄兄弟弟之義民奔讓不爭代還前丞相杜公時
爲御史中丞薦公材能拜御史踰年改司封出知壽州
又移泉州瀕海有渠道迎潮波溉浸旁田數十里自渠
水湮塞田蕪租逋公與疏渠流人還業尋坐舉者奪司
封去官歲餘通判信州知吉州公皆不行泰然有歸止

意上書願休官政以都官員外郎分司南京既而嘆曰
不事事而受祿不可謂廉復申前自列于上乃得請久
之丞相章公言公退靜可敦薄者詔還所奪官居數年
聲聞益達朝廷以紫衣金魚就第褒之用悚動天下士
大夫視聽以重進爲高慶歷六年春疾作次所爲文詞
四百餘篇勒分三卷疾益漬戒其子薄葬若世所嚮浮
屠法輪錢擊鍾與計七日而去齋者皆不得用二月乙
卯終于家年六十八月庚申葬建安縣萬石村公之曾

王父諱某王父諱某皆潛德延休貶于後人皇考諱某
累贈諫議大夫皇妣某氏贈某縣太君公之配朱氏封
長安縣君治家有法卒壽州男覲建安主簿女四人長
適南劍州順昌令丘與齡次適進士丘規次適太廟室
長陳沂次適常州司理叅軍何辟男孫二人曰顓太廟
齋郎曰某尚幼公兄二人長諱某舉進士早亡次贈諫
議大夫諱某與公未仕時固同名右鄉國號爲二曹及
諫議居朝剛直好言明道中以刑部員外郎爲御史知

雜事論請復辟觸章憲明肅太后怒左遷興化軍終貶
所其後天子追悼前忠特以諫議大夫表之公年五十
有四即引身退第舍園池疏列泉石置冊書碁琴於其
中意之所適則娛味終日賓親過從或道時事輒謝曰
吾方與紙上聖賢語差樂勿溷吾聽以是兄弟皆有終
譽公之在官不以法令繩馭下吏刻已率之而吏益畏
不以威刑驚憚下民平心治之而民益信嗚呼終始之
節可謂善矣將葬其孤覲哭泣以書來乞銘銘可辭乎

銘曰

重勢榮利衆所趨也耄昏苟前世所愉也中年能休矯
妄愚也惟公之存勵夸浮也西人之法志古無也今民
涵濡費產輸也遺戒勿用遵禮儒也惟公之沒祛怪誣
也

尚書都官員外郎致仕葉府君墓誌銘

葉氏之先居丹陽在唐梁之際有官于泉州者屬兵戈
起因留官下子孫遂爲今興化軍仙遊人時方否鬲連

世晦遜不克進府君諱賓字虞卿生當天下文治乃始業詞學應進士貢景德二年中第注潮州海陽主簿再調連州桂陽令廣州節度推官商人陳從吉鬻銅錢捕繫吏治急自誣已鑄鑄法應弃市府君鈐案狀不署曰是物非巧工不能爲從吉商也且鑄必有范鎔具今無請更核果得真盜鑄者從吉坐買賣得不死一府稱服繇是有能名尋補建州節度掌書記以保任材廉改太子中允累遷太常丞博士尚書屯田都官二曹員外郎

歷知泉州永春南安邛之臨邛三縣事永春民有先惡嫌者冒重辟府君曰吾仇也獄雖真人亦乘以訾我裁附輕比南安盜截牛舌其主以聞府君陽爲叱去陰令屠之即有告其自殺牛者府君謂告者曰截牛舌盜汝也訊之伏其罪代歸除通判南劍州事劍當閩衝水行持販茶鹽禁物上下山出銅銀冶場凡三十餘所聚四方游黠輕剗擊殺黨與牽連事日下吏懼滯繫被罪率不暇精覈府君專意詰決民得盡其情而獄無留焉

還朝以年七十致官事家居九年慶厯五年正月九日
終壽七十九明年七月四日葬歸德鄉長安里王父諱
檀皇考諱素能以儒書訓子致遂大其門累贈太常少
卿皇妣陳氏追封潁川縣太君夫人陳氏河南縣君厚
淑恭謹動有婦則前府君卒男二人曰任泉州司戶叅
軍所臨職既去人輒思之曰傳登進士第終泉州晉江
尉女五人適郭尹黃佐郭日休郭憲皆進士其季之壻
泉州節度推官方慎德府君爲政能察民善僞與吏情

數苟有蔽謾必立見然正其事則已不深嫉而窮治之
故所至吏民憚其明而不怨躬自儉約計奉以衣食歷
官無錙銖過累既老閑居課諸孫就學時行田壠視農
事載酒肴與旁隣阡巷耆舊往來道說前事以爲樂晚
年資用饒歎曰吾其爲利乎於是籍親戚富貧親疎者
第而散之人益知府君官有餘財而約不以資也葬之
明年司戶君以書并次其先君世族功治卒葬月日因
其子壻漳州龍溪尉許稹以來乞銘於太史氏蔡某某

既以先達輩行視府君又與其子游遂爲之序且銘曰
葉先丹陽官遷于閩室久而通翰飛以振初盤邑治爰
佐南海直民寃死聲問彌大于泉之治決斷大明一語
得盜脫仇附輕劍交衢途猥集剽游事叢獄夥乃恤乃
孚還官卧家協比里閭宴處遨遊歲月之逾老而中禮
仕祿之儀儉則克終德厚之基年豈不多茲實其歸載
行於詞永世之詒

端明集卷三十八

欽定四庫全書薈要卷一萬四千五百三十九

集部

端明集卷三十九

宋 蔡襄 撰

墓誌銘

蘇才翁墓誌銘

蘇才翁諱舜元其先自漢典屬國武英武功其後周
邳公隋房公唐許公文憲四相世居不遷文憲之後
曰傳素避廣明亂西入蜀其子振仕蜀為梓州桐山
令生劍州司馬寓司馬生贈刑部侍郎諱協是為曾

祖考其配薛氏追封河東郡太夫人刑部生祖考贈
大師尚書令兼中書令諱易簡終禮部侍郎祖妣崔
氏廣平郡太夫人禮部生皇考贈工部侍郎諱耆終
尚書工部郎中直史館娶王氏金城縣太君太尉文
正公之女生三子皆有才名而才翁最長七歲能為
歌詩文正公愛且奇之奏授同學究出身調蔡州興
平主簿移尉越之新昌時詔復唐十一科而新令門
選者不得與焉君乞還所有官以應詔不得報乃上

所著文章召學士院試賜進士出身明道中主開封
之扶溝簿畿內饑甚君欲發廩以賑之其令畏縮輒
移病君即出粟以活饑者用舉任者改大理寺丞服
工部喪外除知開封咸平縣咸平聚兵以萬計軍
中旦閱卒有厭大校之虐已者方持弓矢輒怒罵衆軍
牽連一營驚譁君聞之至其所衆惶泣且訴君慰勞
罷之因飲射至暮明日易其軍校而流其唱為驚譁
者遷殿中丞移知眉州眉山會西夏元昊寇延安君

條上禦賊方畧知府事吳公遵路薦其才除通判

闕

州事賊酋李興歸命邊州繫之而上其事踰時

闕

下

君因言其賊來者宜厚其資速寵借以驅

闕

至者李

興輩反為囚虜必已自悔且元昊慘毒而其偏校雖畏

之其心豈易服從哉若餌以購賞必相引而至并陳攻

守利害十二事以聞以太夫人憂去官尋勾當京東排

岸司改太常博士三司使王公任君三司勾當公事出

為荆南路提點刑獄未行易福建路汀州民王甯毆王

先至死以賅蓋覆得不敗且三年矣君至即捕按尚書
屯田員外郎王稷爲部將治窮其事發王先屍驗其傷
猶然以歲久爲請君特奏殺之又遷尚書祠部員外郎
移京西未幾又移河東以弟舜欽謫死湖州求江吳一
郡得揚州未至改兩浙凡四皆爲提點刑獄君益謹職
顏杲卿真卿之後流寓溫州君索其祖告身家諜推之
得其實建言近年守臣因賊屈附抵法誅戮蓋忠義不
修莫爲之勸今二顏之裔曰惟孜似賢皆爲編戶民若

錄其嗣顯白二顏事以動天下可不刑而化朝廷特官
顏氏二子祀明堂恩度支除京西轉運使邕州峒獠鈔
二廣邊用不給君以所部羨錢二十萬緡助之充三司
度支判官至和元年五月初二日終于京師之祖第年
四十九夫人劉氏旌德縣君賢而有法男曰涓大理寺
丞曰澥注洞皆太廟齋郎鴻汶及二女皆幼君曾祖而
下葬開封府開封縣宰輔鄉才翁之歿汴無資產以爲
生諸孤就養江南居潤州侍柩以行某年某月某日葬

於丹陽某鄉使人請銘某與才翁兄弟遊最久今皆已
亡矣尚忍銘哉初才翁少年欲以文詞進願還官就科
試思與天下英豪角逐於筆研間以力決勝不得如其
意逮邊隅兵興夙夜講畫謀策要以術數翦屈夷虜書
屢上不見省用大臣如前丞相賈公丞相文公故參知
政事范公皆持國秉力推薦之終以序進志不得騁平
居談辯唐數百年間喜稱魏鄭公諫諍裴晉公德業李
臨淮將兵衛公處邊事劉忠州通流財利韓退之文章類

此數人而已其議當世人物亦以之爲標的於人少所
稱許至有同班列偕出入漫不省記以是與者益少然
蒞官當事定慮果決所至制束強黠敦尚風儀其爲文
不迹故陳自爲高古雖所不與者亦不能掩也君善草
隸藏書數千卷皆手自讎校譔述奏御集十卷塞垣近
事二卷奏議三卷文集十卷課子舍治經史率有準程
所以諸子皆積學有立銘曰

龍淵之器不投兕犀孰知其利志古豪英不任於權孰

知其智負才自高不屈於人與世或異先民之載德不
必年賢不必位大江之南順卜之吉慶延嗣世

瑞昌縣君孫氏墓誌銘

夫人之父故禮部郎中直史館諱冕在祥符間能直言
有聲名數更劇郡治用嚴明當世推重夫人少喪母鞠
養艱勤及既笄禮部自負才稱又加憐幼女孤苦必擇
奇士得今尚書職方郎中葛君宮公雅遂以女歸葛氏
初夫人之行公雅年餘二十以文詞中甲科爲州將幕

官指期可得貴仕久之回旋銓筦僅工紀平居益邑邑不自得或復慨嘆夫人曰爲官窮通豈不有命耶既而公雅升郎位再以郊祀恩封夫人樂安瑞昌二縣君至和二年公雅罷南劍州夫人從還京師道病發亟命旋歸以三月二十日終於正寢年六十七月二十九日葬江陰軍江陰縣化龍鄉祔於先塋有子蒙登進士第處州縉雲尉女一人未嫁孫六人曰逢郊社齊郎曰充曰三老女幼夫人守禮法動止有度舉族姻內外無有不

得其所持生簡約使公雅能專意公家而無錙毫擾於
民有內輔焉喜誦浮圖書將終遺戒薄葬祭之具神情
如平生無有悲怛蓋婦人之難能者銘曰

叢蘭之芳一香同色生於名家化治禮則歸助其夫約
清厥德惟善不忘壽考有極新阡崇崇子孫孝思寘文
幽堂茲後之儀

延安郡主李氏墓誌銘

延安郡主李氏太宗皇帝之外孫真宗皇帝之甥齊國

獻穆大長公主之女也父爲鎮國軍節度使駙馬都尉
贈太師中書令尚書令許國公謚和文諱遵最大父運
州刺史贈太師諱繼昌曾大父樞密使鎮國軍節度使
贈太師中書令尚書令隴西郡王謚元靖諱崇矩家世
勲業列在國史大中祥符三年十一月主生於永寧第
彌月獻穆公主見主於帝所帝曰女吾之所出也且有
奇法異時非才賢不以逮匹因出縑帛以爲慶逮周晬
召至內省臨視除髮以珍寶戲物百餘種賚之甫七歲

即賜冠帔入謝賜見皇太子將拜之帝曰齒同矣孰爲
長徐推主生月日後皇太子乃使拜蓋欲以長幼序之
每讌會中常呼置旁坐所以恩愛之良厚非諸王公主
女所可擬天聖五年封長壽縣主以歸今閤門使忠州
防禦使錢君晦錢氏自忠懿王舉所承襲十有三州之
籍上于朝廷而其人民數十百萬不罹兵革之役以至
太平陰施深長勲美蓋世主家以是通婚姻及主歸而
其君舅文僖公以代誥命參禁密遂持將相印其族植

笏而通省戶者以百數門闌廝役青紫羣列號爲貴顯
然以主之重務自損下主益恭謹持禮承舅姑奉祭祀
夙暮不少懈姻親娣姒降屈色詞以相接親疎有意於
是諸錢內外悉稱主賢明道二年進延安郡封自和文
公薨主歎曰吾獨有母存乎孝憂愈至時物之新者必
先獻乃敢用皇祐三年獻穆捐世主哀戚甚却珠金之
飾日夜涕泣思慕因見癯悴上念先皇帝弟兄無復存
者乃恤其孤謂主曰大長公主歲常資郡主厚甚今寂

冥耶俸錢九月六萬特增至十萬是年除夕主還外舍
設奠蓋歲新矣而母不復見也號慟咽絕左右更勸莫
能止夜中氣懣胸比歸疾益力戒二子自強以立門戶
斂葬之用必以約四年正月四日終春秋四十有三上
惻悼不視垂拱朝一日命中司賓臨弔賻贈加等以其
年四月十日葬河南府洛陽縣邙山之原從先姑之兆
子三人曰景初光祿寺丞景裕大理評事其季早夭
適右班殿直趙思復封壽安縣君先主二年而亡孫男

四人初父和文公博雅有文喜與賢士大夫游獻穆又以賢德輔之著於天下主更見積習皆善行故不以貴勢富侈自用閭閻民有死喪不能給必資其家隸侍使令未嘗訶譴有嘉賓焉親視烹飪雖其資敏淑然有所從來矣主善書能爲五七言詩居閒設烈女圖讀書史以自娛二子就學日程其所爲又勤解說曰吾觀持梁策肥者外雖矜豪而中空無有多慢侮人豈聖人所謂愛親者不敢惡於人之義乎若不爲此吾意安矣今二

予知所以爲學防禦君能亢其宗以有聲名主實訓有
助焉銘曰

猗哉延安肖於慈親少所養習既歸有聞婉婉令善率
禮而文唯時貴重世莫與隆羣從祁祁車服有容天子
惟舅言朝於中北第高門爰東其軌父王之孫母兮帝
子曰予爾思我適則喜旋於我家相印簪弁齊珥則多
君姑娣姒以承以比和樂有序孝愛深矣哀隕其生子
學而力夫以材名胡不遐考用觀厥成熟不願年曷支

其傾惟德之壽寢久益明於何其壽其壽斯銘

尚書職方郎中謝公墓誌銘

君諱某字某泉州晉江人曾祖某祖某父某以信義稱
於鄉太夫人徐氏生三子君最少祥符八年舉進士歷
撫州臨闕軍事推官太守受賕賄舞法君据平無所

撓訟者不之守而之君州政得不敗守亦善去改大理
寺丞知龍溪縣縣人曰是故州從事持守正使無害有
恩於我相與喜具酒食相過從爲慶賀者至則決滯訟

條剗舊蠹民以便安徙容州北流縣城郭倉庾解舍道
梁一皆新之就知雷州軍州事州傳海有蠻夷風不知
學爲葺孔子廟聚諸子弟教以儒術雷人業進士自君
始大豪李郁築城得古印立盜契奪民田百餘家五十
年不能直有訴於君者即捕繫庭下問狀具伏而郁老
當贖君條其甚惡不可假卒致以法通判福州畫購巨
盜悉誅其黨諫議大夫方公謹言治廣州辟君貳政廉
取番舶輸官之利以招其徠至罷去夷人涕泣思之知

建州歲無留獄長老紀焉又知開封府之祥符治愈精
微有聲名朝廷用薦者言將任以刑獄錢穀而君懇求
便藩得海州會歲旱有蝗過境一昔拱穢死吏民驚歎
以爲異政之應皇祐五年正月十四日卒於官其孤護
全柩以歸某年某月某日葬某縣某里娶黃氏故直史
館宗旦從妹也再娶其弟封永康縣君子四人彥輔太
廟齋郎先卒仲規舉進士第越州蕭山尉叔矩未仕季
成太廟齋郎女八人適余晒祝嘏楊璟劉鼎臣黃世永

朱仲陳大雅陳箴君性樂易無貴賤親疎接之皆盡其衷故人多喜愛之數官嶺表不以僻陋自失所至喜設施爲民賴利在海州嘗謂其子曰謝氏居閩未有仕者吾起家州縣自大理丞八遷爲尚書職方郎中贈吾父都官郎中母長壽縣太君斯亦榮矣厯官三十九年無小過失實吾謹畏然爾汝曹念之故其子益循篤學皆可以大其家者銘曰

六十九爲已壽位郎官才未究政在民斯不朽

內殿承制王君墓誌銘

王君諱翊字輔之兩浙都巡檢使罷還皇祐五年五月
七日卒於京師以其年七月二十四日葬於開封府開
封縣褒親鄉其孤號哭而杖授書使者以來請銘曰我
先君之先錢塘人後遷於汴少孤家窶以書藝補官歷
七任終六十有一今葬有期且走公門下日久固知其
所爲幸或銘諸墓使有聞於後世公之賜深矣余爲次
其官族初授涇州保定主簿治有稱再調永州司理叅

軍州將曲獄君曰獄辭定法可妄移哉永邊溪洞蠻獠
寇境殺巡檢使君請募敢戰五百人自率之遮阨設伏
餌以羸形賊果來擊之敗走入焚其廬以理官不應捕
寇不當其賞除常州無錫尉轉運使段少連以材明嚴
察部吏每行郡縣必載君舟中語至移日出界乃遣尉
滿君歎曰俸微不能比吾族還都退居視時物上下取
與出納居二年廐有粟馬所與遊皆貴近人久之陝西
用兵討元昊君奮曰陋矣吾視此屑屑耶上封章言十

事書奏即召對延和又令於資善堂究陳利病再遣使問所欲爲曰臣言可用幸天子用之不敢徼利夏隨爲陝西招討使薦君智能授左侍禁涇州長武寨主元昊入寇至渭州寨民將逃去君諭之曰入保此吾能必守衆乃止遷西頭供奉官河東麟府路走馬承受公事專置堡寨一十有五招懷蕃戶二萬餘每進對多言時政得失輒觸權要再遷爲承制三司使葉公清臣任君監在京權貨務僅十月計所贏錢二百萬三司使移他官

君失所知求見上言事願解局遂除都巡檢使又上書
曰臣有通流貨財之術歲可得錢千者四百萬欲道其
所以然於上前再三不得召猶曰罷歸幸得望殿陛咫尺
盡吐吾術矣比至京師病且卒卒不能出其術悲夫
君娶胡氏子七人男曰威三班奉職曰兢競舉進士兢
中第詰珏皆幼女長適前河中河東主簿呂公次適謝
公弼早亡銘曰

材以時成則資材艱於用匪成之艱利國有原動如轉

園曰時與成惟命惟天

右班殿直監慈湖都鐵冶務程君墓誌銘

程君居興國軍大冶縣世爲著姓右班殿直諱叔良字仲卿尤有善行其曾祖諱侃仕僞唐軍器副使祖諱滿光政院承旨父諱昭字某三班奉職以材智自高金陵平浮江而上至慈湖依鐵山冶以通吳蜀之利積數十年致鉅資散施周人急難名譽翕然君承父兄之舊少從學好老氏書服其慈儉之訓所居夏秋潦水環民舍

衣食無所從得君計其口而食之疾者餌以藥石死者
塋以槨歲用爲常明道中江南饑疫殍殣狼藉道上詔
督郡縣開廩以濟之發徒以瘞之尚莫能周而君之里
間無饑人無露骸其視人之所苦若出於已晝夜不懈
親戚之貧而歸隨所厚薄而活之至於資身自爲約薄
不營出入悉責家奴時一省視去其欺已者以是雖居
豐有而甚適旁居田野治園池植草木發泉石在處爲
亭臺賓親遊行嘯歌一醉灑然當世名公卿作詩以詠

道其善年五十有六以疾終皇祐二年閏十一月六日也將疾自疏簿目一通皆治喪事親族之禮施用之具與其葬所若年月日既終其孤啟而行之無有乏事遂以五年十月二十五日葬於流水里之南岡君兩娶鄭氏有子九人男大年三班奉職治經史力世其家曰龜年堯年康年敏飭向學女五人長適大理寺丞丞郭之美次適開封府太康主簿蔡高次適衛尉寺丞聶平仲二人尚幼太康主簿子亡弟也以婚姻家知君最舊有

所部官嘗以書通客與之錢不能塞欲其人後言財利
事得出使南方猶泄前怒增君官課鐵歲百萬指期必
破產或諭君出其手迹以直其事君曰寧破吾產勿破
吾行予乃知君終長者爲之序且銘也銘曰

致適於無以放其身厥隱於真捐已之有利及於人唯
義之倫愛協鄉閭不獨其親允富其隣生也勿累沒焉
不泯考信於文

泉州司戶叅軍葉君墓誌銘

葉君任字仲堪興化軍仙遊人父諱賓尚書都官員外郎致仕恩補一子官君以是爲江州德化縣尉歲餘乞便家事親得泉州司戶叅軍時監司有不喜君所爲不苟者因自牒去職歸侍都官府君至歿不去左右遂無意仕進以終其身君於爲吏臨衆必先繩其尤強猾者治民必先憐其尤貧弱者故所至必辨而去則思之上官以勢奪其是如以礫食吾不從也其餘家居廩有餘粟遇歲凶荒薄其直而出州黨賴之民有喪與疾時其

急難以濟其力游舊之好益困愈親若寒而就燠吾不
去也故其生也人譽之而亡也哀之迹其所從來蓋有
以得之者初棄官歸年方壯強頗窮山水娛詩酒以自
放或說君起仕君謂之曰達者人之表而議之招也享
其利而不勝其任得所欲而違於義君子不爲也古之
人所以約而自全者其心豈異乎人哉蓋知其所以然
而安於分也且怵惕窮年孰與茫洋無間以自適乎君
生五十四年而終於嘉祐三年十一月三十日葬於歸

德鄉化善里其世次予嘗誌都官之墓可從而考也初娶王氏再娶呂氏皆有賢行而早世長子曰祐以文詞爲名進士卒年三十曰裕十有五歲持父喪如成人曰裕尚幼女十一人二人適太常博士許禎郴州宜章令陳啟期六人爲進士妻三人未笄許君與予善述其孤之意從予請銘銘曰

行修於鄉而老少之懷志安於分而榮悴不遷此力於吾道者也若夫冥乎造之有端託於適化之會於我不

居乘時以行抑老嚴之徒歟

太常丞管勾河東安撫使機宜文字蒲君墓誌銘

蒲君叔範天聖八年自閬州以進士貢至京師年二十
第中乙科余時少君一歲而第同籍居同巷出處相從
意氣相得也皇祐五年君以太常丞管勾河東安撫使
司文書隨其府君并州而余爲知制誥權禮部貢舉有
以雄詞壯論異於衆者驗其名氏曰蒲宗孟其父師道
乃君諱也是年春宗孟釋褐予喜君之有子且將賀宗

孟歸亟以書計曰我先子以四月一日終於官孤宗孟扶喪以寓京兆明年十一月一日遂葬京兆府咸陽縣龍首鄉之北原敢以告余既弔之而爲之誌其墓曰君曾祖茂璘仕僞蜀爲彭州判官祖頴士善藏書父伸贈大理評事三以鄉薦退於春官自號北谷散夫君承父詞又得所蓄書以讀而性警悟十餘歲能誦經傳屬詩賦陳漸以文學名於蜀一見君所爲詞章乃以女妻之今延福縣君也太夫人陳氏追封奉先縣太君君少失

所恃事繼母朱氏封壽昌縣太君禮孝尤至故鄉黨稱其詞行及蒞官處事又以材聞初授成州團練推官吏易君年少不更事君未旬月已通法令簿書槌其隱謾惕惕畏服再調延州推官元昊慢形見君謂州將郭勸曰度元昊必變變則延爲寇衝城圯塹堙無以爲備願建言治之郭勸以其言聞於朝報不下既而元昊果叛詔城延州君曰役促民勞未戰而困也范雍以振武節度爲陝西經畧使治延州官者盧守懃爲兵馬鈐轄中

貴人臨邊自喜事必已出嘗欲決有所行而雍難之守
懃怒發聲色引起君止之復坐曰太尉爲大帥而軍政
不一鈴轄驕傲如此何以帥下願太尉斬之以徇衆守
懃泣恨日擯其過至罷歸莫能塞所願尋爲武寧軍節
度推官梁洋二州人爭水利數十年競訟至破產不已
朝廷下其訟轉運使遣君按視君從二州人以行隨所
曲直而辨之爲立約束分水溉注二州之人各當所欲
迄今便之以父憂去職服除除鄆州觀察判官監杭州

清酒務改太子中允知京兆之高陵高陵前號難治君
後威刑而先禮教有父兄告其子弟之不令者君召其
子弟語之曰順於父爲孝順於兄爲悌汝以悻父兄之
心遷而爲順則爲善人夫何難哉我即坐汝不人類矣
聞者愛服遷善縣豪距縣二十里作府君神祠以巫覡
蓄蛇恠日言禍福簫鼓歌舞通晝夜男女往來輸金繒
木石爲之立廟至有冒爲尚方器服者君與民期曰令
將禮府君神民間令來悉集既至羣豪翼巫覡以導君

曰未齋潔未宜見神且汝能迎置府君神者及能帥衆力而廟者巫能通神以下禍福者果誰乎衆各指之君即麾縛數十人繩以嚴法籍其財而夷其廟移知泉之晉江會宣徽使李昭亮知延州奏君改發署判官事宣徽徙澶州并州皆辟爲從事君感宣徽之知己事無鉅細力爲畫議君沈靜有識慮歷於貴勢必諍辨是非平居鮮語人過喜察姦貪梏其手則已不務煩苛善議論上書言禦戎備蜀廣儲嗣事皆切於世者而官止太常

丞年止四十有六自初仕至終皆在幕府助人爲政而
未嘗得專所爲以見於人也既卒貧空孤宗益紹其家
有女七人三嫁爲士人妻四人尚幼其稱明年至和元
年也銘曰

才不必有位而德不必有年或曰命然生有善行而歿
有嗣傳孰與祉焉已乎奈何歸安茲阡

端明集卷三十九

欽定四庫全書舊要卷一萬四千五百四十

集部

端明集卷四十

宋 蔡襄 撰

墓誌銘

尚書職方員外郎呂君墓誌銘

呂君諱士昌字子弼天聖八年舉進士及第調吉州
永新尉婺州司法參軍用舉者改大理寺丞監常之
商稅務移知益州靈泉縣以太夫人高年願監舒州
皖口倉未行服喪外除知江之德安罷歸三司使田

公況辟君編三司例策書成二百卷權知功州五遷
為尚書職方員外郎知潤州以代期未至寓居江陰
軍嘉祐五年七月十九日終年六十二七年正月十
三日遂葬之江陰之江陰縣化龍鄉曾祖諱裕東平
壽張人祖諱某贈大理評事父諱延之終湖州節度
判官因家真州之楊子縣贈屯田郎中母趙氏贈永
寧縣太君繼母孫氏仙遊縣太君娶葛氏封壽昌縣
君男三人曰袞許州臨潁尉袞袞皆進士女二人長

適楊維次未筭范文正公薦君館閣之職田公又薦
為提點刑獄皆未及用而卒子弼寬恕渾厚與之言
初若可見其際及游泳益久即不知其所之視世俗
窮通壽夭榮悴憂喜無一事可係其志居閒讀書為
文優游終歲其與人處若概取之從容而論當世士
蓋所與者無幾矣嘗得偽造印文者其法應免遠官
及移蜀或謂用此可免君曰幸人之死以逭移蜀吾
不忍為其所以為人大率如此此前世所書有德義

量度君子不能過也銘曰

內全於德不與世異官無顯功進不近利古有君子其道斯類巍然高風薄夫之媿

贈光祿少卿沈君墓誌銘

府君諱平字遵道曾祖曰籍衢州常山令祖曰德饒越州剡縣丞父曰仁諒海州朐山令其先吳人剡縣丞卒葬會稽後朐山退老於和州因而家焉君少與伯兄曰及舉進士為文章通書史既而伯兄景德及第以仕而

朐山致政事還歸君曰吾其養親乎歷陽闢田疇因物
適變遂以富饒計鄉黨親戚厚而周施之逮親終伯兄
服喪乃籍所有以奉之伯兄曰吾利汝財乎於是悉力
以治喪事久之族子欲異產與之利田宅而自取其中
下者衆益義之君曰吾有五子教以儒術清白足矣其
不富之患乎以天聖二年四月二十二日終是月二十
八日葬於龍場岡之原夫人胡氏男五人曰立齊京言
充女三人君早歿夫人賢而有禮訓育諸孤立以進士

中科爲尚書兵部郎中兩浙轉運使迎養三十餘年累
贈君光祿少卿敘封夫人壽昌縣太君嘉祐六年夫人
卒明年舉祔舊塋兵部博學有文藏書二萬卷又所至
稱職將以材能進於時宦仕顯榮其可量哉所以知君
識慮之遠也銘曰

不仕而耕以養其親而終其身於嗟孝兮力而豐有施
及州里推其族子如其義兮守法儒學教厲子孫實大
其門不亦智兮龍場之下卜吉而藏勒文前岡孰與壽

兮

尹夫人墓誌銘

夫人姓尹氏父尚書職方郎中直昭文館諱少連郎中有數子而女獨夫人又少聰警識圖書辨音律故加愛焉及長以歸國子監丞葛君實丞晚得官當未仕與夫人治家事夫人事姑勤謹不懈而於夫人之族親撫接皆有禮意母楊氏諸子隨官遠方夫人念母之老迎歸以養年八十餘終於夫人之家即葬近墅其於孝愛深

矣丞以文進而久不第夫人未嘗戚戚歲時奉祀與娣
姒族親宴飲列女僮鳴管絃以相和樂觀世之休悴初
不經慮益喜浮屠書頗知其指歸有男令彥汝奇皆舉
進士女適真定元氏主簿施硯其季幼也內外孫八人
享年六十以嘉祐六年八月初九日卒八年八月十五
日甲申葬江陰軍江陰縣化龍鄉丞曰吾妻之賢君不
可以不誌間千里之遠以來請銘某銘曰

詩稱公侯首考其家均一之德法度是循唯彼婦道於

斯則難嗚呼夫人茲其尚焉

光祿卿致仕張公墓誌銘

公諱昱之字景山其先黃帝之孫始作弓矢主祀弧星
以官受氏周衰六國爭雄而張氏五世相韓良佐漢有
功侯於留留侯之後丞相禹司徒歆子孫益多散居四
方其居東南繼爲大姓曰簡者廣陵人生昇仕唐爲滁
州清流令昇生約金吾衛長史約生訓公之曾祖也以
勇謀事楊行密爲黃州刺史祖諱璆仕僞唐校書郎後

典親兵贈尚書屯田郎中祖妣顏氏考諱似右內史學士太祖平金陵從後主歸京師授贊善大夫在太宗朝建言時務評讞法令多所施用終給事中累贈太尉妣馬氏贈清河郡太君公少孤知力學問有名於時大中祥符八年擢進士第授温州樂清尉再調潤州觀察推官召還校館閣書遷殿中丞集賢校理通判常州常饑發運使急於官糴穀益貴公奏罷糴而民不流亡蔡文忠公薦其材可任監司之職時輔臣不公悅者出知溫

州文忠公又薦之徙淮南提點刑獄楊崇勲以恩倖橫
恣護吏漁民縣令有不已從者崇勲怒下令獄公往察
問而出之流所護吏數十人崇勲怙怙顧首尾於是部
郡相視以法移廣南東路轉運使廣之夷落有罪任其
首以夷刑夷刑慘酷公請以律令論海外船舶歲至犀
珠瑇瑁諸香奇物官取十一城中濠與海通惡少年暮
夜乘潮汐苞藏奇貨重物不肯輸官前有欲爲水柵以
制之者卒中毒死事遂寢公治材他所一日移置濠上

水柵立成貨利稍稍入官海有羣盜聲指廣城民相傳
動驚走郡爲備具公料賊來不先聲徹備張飲人得以
安賊亦果不來代歸權三司度支判官未幾除戶部踰
月出爲京西轉運使且行加直史館改授河北賜三品
服是時契丹頻年遣使道路交衽供具百名取辦於民
邊郡益戍兵調周滋廣公計其所必用取之擇其所不
急去之不以名使人要必功實雖米鹽下吏莫不延問
稱薦禁束侵牟故吏畏而爲用民以是便之轉工部郎

中召還爲三司鹽鐵副使其職文書繁夥公一省不忘
條理出入下不敢欺三司使奏他事上見公姓名獨語
曰必須再去又首肯之明日除天章閣待制河北都轉
運使入辭上曰卿之行出朕意既至鹽書委以密察邊
事軍馬重輕與兵官材否公感激天子所以推信勵力
以安百姓實邊塞選兵擇吏爲國久計未幾保州兵叛
州兵幾萬人號都巡檢司先嘗從太祖北伐有功敕其
軍每出巡別給金粟兵分三部州將領其一裨將領其

二其後州將典城兵不出巡亦不復給裨將皆中貴人
月必出巡出則給之或言其不均者朝廷委公其事即
允以武臣代中貴人總三部之兵更其出入而廩給均
焉中貴人罷去悒悒懷恨未有以危公者會監郡與主
兵官不相能辱之兵怒殺監郡閉城叛而以公罷其金
粟之給爲名公馳至城下廼即以兵環之朝廷累下敕
榜招降而門其東西至堅且懷疑太子少傅田公況時
總其事遣部將郭遠入城曉諭門開諸將入其唱爲亂

者千餘人衆恐其爲變公謂田公曰保界敵壤兵驕叛
亂如此反覆未可知今不芟除所謂養虎自遺患也於
是悉坑之保州平奪職知虢州居三年貝州軍亂先其
所欲危公者謂公前使河北有妖人李教坐法公寬之
貝卒得李教爲師以亂冀人旣得政將詣登聞自陳常
爲李教獄詞逮連教父曇轉以私書屬公同職者得詞
絕至澶州監河橋索其橐以聞事下御史府貝之亂實
無李教而得政所訟無根猶追三官監鄂州商稅復工

部知漢陽軍祀明堂恩遷刑部復待制知湖州又移揚州公自以直廉遇天子任使欲以所有唯上所用不幸一跌摧落不復自振年且至矣遂上書乞還官職之事徙潤州申請益堅除光祿卿致仕還老常州以嘉祐七年十一月二十九日終年七十八遺命葬滁州清流縣昌城鄉杜沛村從先人之域諸孤以治平元年五月二十六日克葬先夫人任氏後夫人魯氏參知政事肅簡公宗道之女封閩壽郡君男曰次卿試將作監主簿早

亡曰次山次元竝大理評事有材能名女六人長適京
西提點刑獄宋任次適廣東路轉運使祕閣校理蔡抗
次祕書郎田沆次著作佐郎蔡天球次新鄉令石約次
大理評事呂希哲公忠廉鯁直以節義自尚愛友親族
甚厚謀於國不以其身之安危篤於親不以其人之厚
薄吏治精明施設若煩密難通而公持之簡易所至民
懷其惠而不觸其令尤於本朝故事詳悉自建隆以來
史所不紀每指一事即疏其人姓名年月最爲審據家

居或客使造門語及天下利病慷慨議論憂發顏面忘其身之老也夫士之處世立一節一行已能自見於後況其多者然必有誌錄乃可傳信銘曰

礪世之速先於飭身防吏之嚴本乎愛民資國以富其要曰仁佑武以制其威曰神力志於斯庶用自伸矯矯在公卒薨於人顧言返葬杜沛之原寘文坎中名與石存

工部尚書集賢院學士贈刑部尚書謚曰襄余公

墓誌銘

治平元年六月癸亥工部尚書集賢院學士前知廣州
軍州事余公薨于江寧府之行舍以聞天子爲之不視
垂拱朝一日賙賻有加贈刑部尚書謚曰襄其孤奉公
明年七月二十七日葬以計來且求誌其壙某爲次哭
之已謹序之曰余氏自閩徙於韶之曲江曾太父從大
父營父慶累贈太常少卿母黃氏追封吳郡太夫人公
諱靖字安道天聖二年中進士第尉虔州之贛縣又中

書判拔萃科改將作監丞知洪州新建縣再遷祕書丞
入崇文館校三史謬誤景祐三年充集賢校理范文正
公知開封府屢言丞相過失貶饒州言事者畏縮不敢
論列公即上疏曰古之帝王逐諫臣終爲盛德之累仲
淹宜在朝不宜遠謫坐是落職監筠州稅尹公師魯歐
陽公永叔繼之皆以朋黨斥去某官微不得自達作詩
四篇以直之一日傳於京師故天下目爲四賢移監泰
州稅又徙知英州丁太夫人憂還朝復集賢校理同判

太常禮院慶歷三年上念西夏亂邊官軍屢敗四方困
于供億因增置諫官四員以補聰明向之觸丞相而得
罪者頗引用除公右正言於是朝廷之大議政事之得
失權臣材德之是否士大夫之賢不肖莫不盡心而舉
正也元昊爲患日久時議有金繒之賜輒首罪稱藩將
從其請而契丹聚兵燕朔曰我爲南朝皇帝討夏人勿
宥其罪朝廷謂借契丹之兵以討賊則彼自矜功拒元
昊之請絕其向順之路必也却契丹而納元昊當得使

者以成其事公亦屢言二鄙利害乃遣公使契丹既至
辨其曲直以理奪之比還契丹收兵元昊稱臣四年知
制誥史館脩撰其年再使坐習蕃語出知吉州數十年
間天下風俗以謹默自守掩覆瑕垢爲長者一日刺舉
彈繩多或罷免又嘗所言者進持國柄仇人乘勢中以
事授將作少監分司南京久之改光祿少卿天子且欲
復用權臣以諸衛將軍壽州鈐轄處州服父喪儂智高
陷邕州循流東下破九郡次廣州以祕書監起公喪廬

知潭州金革之事義不得辭改知桂州經制廣南東西
路賊盜事廣城堅不下賊大掠西歸所向無前趨邕州
欲倚峒穴爲久居計公先移檄交趾及諸峒使之捍賊
智高至外無助援會朝廷命狄宣徽青將兵至公與孫
公元硯實共其事智高敗走復邕州乞解官追終喪制
詔不允除給事中仍治舊府御史梁倩言賞不當功又
遷工部侍郎選死士入特磨道生擒智高母與弟送闕
下戮之充集賢院學士尋遷戶部自言久官嶺外瘴毒

所侵惟陛下哀憐又移潭州青州遷吏部嘉祐五年交趾入邕界殺巡檢五人驛召公於青州上諭之曰卿孰南方事已授卿廣西體量安撫使其勿辭公至邕召交趾用事者費嘉祐詰之曰汝主世爲藩臣何敢爾耶邊民私忿相酬不知官軍誤犯之幸得自新當送首惡者歸命既而械致五人蒞刑于欽州歸奏所以治蠻之狀授尚書左丞知廣州今天子即位遷工部尚書廣多竒貨南官者蓄以爲利公戒其北歸勿得持南物其俗輕

揚教之禮法簡而不苛去之日百姓懷之公薨年六十

五娶林氏贈尚書工部侍郎從周之女封魯郡夫人男

三人伯莊殿中丞早亡仲荀太常博士叔英太常寺太

祝女六人長適尚書屯田員外郎郭師愈次祕書丞孫

邵次建州司法叅軍周熊次祕書省校書郎章惇裕二

尚幼男孫四人嗣恭嗣昌皆太常寺奉禮郎嗣隆嗣徽

未仕女孫五人文集二十卷奏議五卷三史刊誤四十

卷公之在館閣居諫院某嘗同職事其斥筠州使契丹

經制二廣賊盜平定交趾知廣州皆見其行也故其學術文章忠義謀畫知之最深居常謙畏寡言不敢少忤於人及論事上前分解落落詆刺大臣易於褐夫出入兵戎危難之地若在宴處何其壯哉已之無悶用之有爲斯其蹈夫道者也銘曰

公進於朝卓爾辭執任之諫諍直言警世西夏亂常寇攘洊歲翻然向內願輸信誓契丹橫議集兵幽薊單車出使安危是繫胡騎引歸羌酋受制風雲指麾天日清

霽峒獠猖狂自西而東起于魯廬經制元兇賊竄窮荒
生致其母戮之馬市腰領殊處交趾來擾再往南土呼
其種豪屈之一語二廣十年恩威是宣公薨民啼其何
使然返于故

缺

終斯全我銘公墓唯信之傳

司農少卿致仕王君墓誌銘

達夫諱益恭姓王氏其先居太原徙潞州曾祖諱崇贈
太師曾祖妣周氏齊國太夫人祖諱景純贈太師中書
令祖妣祁氏魯國太夫人父諱慎樞密使吏部侍郎同

中書門下平章事贈太師中書令兼尚書令魏國公妣
石氏追封永嘉郡太君寇氏華原郡太君自魏公始家
河南今爲河南人君於大中祥符間以蔭補右侍禁天
禧三年奏換衛尉寺丞自衛尉六遷爲尚書司封員外
郎康定二年以司門致仕皇祐三年大饗明堂除庫部
以大祀恩用子升朝例敘封改水部又改倉部考功二
郎中嘉祐八年上即位授司農少卿治平二年三月十
二日終於西省思順里第年七十四以其年十一月二

十八日葬河南縣魏封原先公之域娶李氏封金城縣
君子二人謹言尚書駕部郎中謹行殿中丞女三人君
所歷官監昭應宮法從庫開封府襄邑縣稅西京麪院
磨勘司簽書河南河陽府節度判官公事最後知河南
縣凡九任行三十年清修無過必稱其職嘗慕唐王龜
之爲人務遠權利魏公之治雍益襄汝也皆去官侍養
逮叅知政事於洛陽治新第成君致書於魏公陳老聃
止足之戒願引年謝政還居於家輔藥石導和氣以延

壽命言詞懇懇公以詩答之曰疏家子歎揮金後禦寇
妻悲遺粟回爭似吾兒知止足陶廬容膝早歸來公以
朝廷恩數倚任之大至於將相終缺薨服除君授河

南自伸夙志遂還官事日與高隱者遊晚年喜釋氏篤
好華嚴經日繙一帙深通體用止觀之趣家所藏書雖
子弟求閱必手自檢授出入甚謹而於田產資利隨所
厚薄視親疎急難賑濟之不復會校洛下多名園時與
其弟觴詠終日陶然自娛居閒古書真畫間或展閱其

外紛綸過前不吾接也嗚呼當少時父爲大官乘勢可
進輒以書規切冀其引罷仕及中年後有顯位可指而
待輒棄爵祿人情莫不好榮觀而厭卑處君豈異於人
哉顧其中所存者勝所爲故能安於所尚非天機淡泊
動與道合者惡能至是邪某與君昆仲游最久於葬之
先君之弟兩浙轉運使尚書刑部郎中集賢校理益柔
狀君之行以銘見託銘曰大道之行人隱于天其德純
明不居物先薄夫懷貪生死利勢扳躋勇前罔或畏耻

嗟嗟夫君中年退休超離造化蕭散林丘高尚之節可
監於後聲名日遠於君何有

尚書屯田員外郎郭公墓誌銘

郭君諱之美字君錫世居廬陵自其考始以文詞舉進
士君錫少聰敏加人從其父學景祐元年年十八與其
父同日登第仁宗皇帝臨軒賞其爽異爲改今名初調
蘄州蘄春再授楚州淮陰皆爲主簿以吏事不中法去
官慶厯三年爲梧州司戶叅軍

缺

年復注惠州轉運

使聞其名用之權韶州

缺

州有鑄錢監監卒怨其監

官是時儂智高叛輒請於監軍韋貴曰願往邕州擒峒賊貴叱去之君策其必變曰叱之所以激之也陰爲州備其夕監卒殺監官趨州門斬關且進門有備兵出其不意格鬪誅斬畧盡儂智高入廣州肆兵外掠又移權知南海番禺二縣募敢勇亡命之徒遇賊必戰殺獲甚多所至賊爲之縮斂蔣偕被命專討軍無法律遣使召君計事辭不往後數日偕爲賊擒皇祐五年以功除大

理寺丞簽書南雄州判官公事以父喪不行又丁母憂服除以大理丞知兗州萊蕪監嘉祐五年遷丞殿中監在京豐濟倉賜緋魚天子即位恩遷太常博士初作永昭陵河南府素號窮空所費仰給三司時余爲三司使薦君於永安入中錢糧善計纖悉終以辦事時議稱之改尚書屯田員外郎治平元年知開封府中牟縣縣居京西一舍仍歲水災多盜賊賦斂頗數民益貧君視其部中溝洫不治因上書乞治水嚴盜禁均賦役朞月之

間使客稱其畢給百姓頌其均平而不擾未幾以命免

仍坐舉故人之爲長吏者入官長吏有罪追君一官罷

去百姓條君善狀訴於京尹願留不得即遮丞相馬首

叩頭噓唏幸少賜我既又不得泣涕而去明年歸蘄州

未至終於舒州桐城之傳舍其孥以喪歸十二月二十

一日葬於蘄水龍潭山先人之塋享年三十曾祖諱諫

祖玠考諱佺

缺

事推官累贈太常博士妣施氏封安

福縣君

缺

娶程氏再娶王氏男曰大時大明爲進士

大昕大闕與三女皆幼君好學多通理勢重輕之術每

官必有記述皆世之要用有文數十百篇尤善論兵數
上書言慷慨病且革歎曰丈夫固當以病死耶君之弟
之翰以書自蘄至杭告余曰兄辱知於公今失官而死
且葬矣公其哀憫其孤而銘其壙以慰存歿余爲之銘

曰

事而不試惠而不施古人有言世莫我知進焉而躋壽
止於斯匪世之疾又將咎誰

尚書禮部侍郎鄭君墓誌銘

鄭君諱紆字武仲先世居秦曾祖諱保雍始居安陸客
有寓錢數百萬而死他日得其子還之客子莫知所由
辭不受遂施之浮屠氏於是湖湘之人稱其長者祖諱
嶼東頭供奉官嘗總兵秦隴間以數十騎入乘虜鄣虜
畏其名考建中舉進士積學而多材能悉產以濟人急
難故與游者多名人君承數世累義之美資性明敏所
習過人初應明經以爲不足以自立曰吾豈誦數者又

舉進士天聖八年登第主安州之應城簿越州司法叅

軍改大理寺丞遷殿中丞歷知婺之蘭溪越之餘姚徙

知益之新都貧不能行監楚之北神稅湖南安撫使王

絲薦君爲簽書桂陽監判官廳公事權潭之長沙其縣

喜訟難治君視其繁閩簡其術如無一事劉丞相號爲

明果時知缺所爲大喜稱歎轉運使時其事叢臨縣

觀缺狀非其要不問問即自服雖得罪者亦喜躍而

去郴州宜章民持僞券奪人之田屢獄不直委君決之

君攬案曰義章以太宗舊名而更之市田之歲在義章其券乃今宜章印也獄遂決三遷爲尚書都官員外郎審刑院詳議官峒蠻儂智高寇邕州詔龍圖閣直學士孫公沔往經制之辟君與行從招討使狄青破智高於邕州界是夜軍輒驚擾孫公謂君曰行者數人多以事避去今獨君在此真義士也以勞授職方權大理少卿君通春秋及爲法官多引律傳經酌理叅獻有可矜者必爲之言殿直曹且監主自盜應死君曰其父僕嘗戰

歿仁宗聞之惻然爲減一等仁宗恕寬哀矜今天下大辟有疑或情可憫者得以上聞四方體朝廷好生之意率以情法遷就求爲未減君曰法正情直州郡當自決之今乃諉上以苟僥倖類是者請致之法於是朝廷著令以班天下遷祠部郎中嘉祐元年五月甲子卒于官壽五十有六累贈尚書禮部侍郎喜讀書記其大旨以資職業比爲審刑大理以中道論法不爲守文吏故所濟活甚衆爲詩有精思入唐人風格清峭可尚尤善章

奏書牘諸公或請之皆了其意而文彩蔚然祖妣傅氏
妣楊氏天水縣太君劉氏河間縣太君娶李氏汝南縣
太君駕部郎中文蔚之女今夫人鮑氏樂安郡太君其
父闕職方郎中男五人獮著作佐郎知潭州攸縣缺

諫知制誥知荆南府猗將作監主簿猛未

缺

士張蒙

山以治平三年月日葬于安州安陵縣某鄉余與君爲
同年進士嘗仕官往來數相遇於淮浙間每見飲酒笑
謔不休皇祐中司諫以文中科爲天下第一余嘗慶君

曰子爲狀元而其父固可知已用是爲適今援毫襞紙
遂銘君壙遽至於是乎銘曰


材力之次要必有成文詞之敏煒燁敷榮傳經裁讞區
處和平世資以義用永厥聲屯于其躬來者其亨坎中
之紀後世之評

端明集卷四十

謹案卷三十八第五頁前一行姑於其婦益慰愛
之刊本於其訛其子據別本改

卷三十九第五頁前四行在祥符間能直言刊本
能訛少據別本改

第八頁後二行主更見積習皆善行刊本積訛清
據別本改



總校官庶吉士 臣張能照

校對官助教 臣黃昌禔

騰錄監生 臣羅翹遠

財團
法人 佛陀教育基金會 釋淨空 敬贈